

四庫全書

史部

欽定四庫全書

欽定續文獻通考卷二百十八

物異考

木異

宋理宗景定四年五月成都太祖廟側大木仆忽起立
生三芽 五年七月丙申知嘉定府洪濤言新繁縣御
容殿前枯木再榮

臣等謹按王圻續通考載理宗淳祐九年祠山廟

戟門前桂樹上花一簇十有四莖莖開五葉狀如
紅梅考紀志皆不載

恭帝德祐二年正月戊辰寶應縣民析薪中有天太下
趙四字

遼太宗會同五年十一月己未武定軍松生棗

聖宗統和十二年三月己巳涿州木連理

金衛紹王至寧元年宣宗彰德故園竹開白花如鷺鴒
藤

宣宗興定四年華州渭南縣民裴德寧家伐樹破其中有赤色大字表裏脗合

有司言與唐大歷中成都瑞木有文天下太平者其事頗同蓋太平之兆也乞付史館

元成宗元貞元年太平路蕪湖縣進榆木有文曰天下太平年

文宗至順三年六月晉寧冀州桑災

臣等謹按王圻續通考載世祖至元十九年處州

麗水縣樟樹生梨可食史不載

順帝元統二年四月大名路桑麥災 至正三年夏上

都大都桑果葉皆有黃色龍文 八年九月奉元路桃

杏花 九年秋奉元桃杏實 十二年五月汴梁祥

符縣椿樹結實如木瓜 十四年八月冀寧路榆次縣

桃李花 十五年十一月汾州介休縣桃花 十六

年七月彰德李樹結實如小黃瓜 十七年十一月汾

州桃花 二十一年明州松樹結實其大有盈尺者

八月汴梁祥符縣邑中樹木一夕皆有濕泥塗之

臣等謹按王圻續通考於二十一年後有云辛卯夏松江普照寺僧舍一敞帚開花又嘉興儒學閣人陶氏磨上木肘發青條開白花又吳江分湖里鍛工一柳樹樁以安鐵碓者且十餘年矣發長條數莖如葦十一年進賢縣瑞竹生今考歷代甲子錄辛卯係順帝至正十一年殆是年歷有其事而王圻誤載於二十一年後不及檢也

明成祖永樂初取材川蜀大木自出抵江上

先是四年閏七月詔以明年五月建北京宮殿分遣大臣採木於川廣等處工部尚書宋禮伐山通路奏言得大木數株皆尋丈一夕自出谷中抵江上聲如雷不偃一草朝廷以為瑞

孝宗弘治八年長沙楓生李實黃連生黃瓜 九年三月長寧楠生蓮花李生豆莢

世宗嘉靖三十七年十月戊辰泗水沙中湧出大杉木

圖丈五尺長六丈餘

穆宗隆慶五年四月杭州粟生桃

神宗萬曆十八年五月丁卯祖陵大松樹孔中吐火竟
日方滅 二十三年十二月癸亥皇陵樹巔火出延燒
草木

臣等謹按以上二條互見大異門

熹宗天啓六年四月癸巳白露著樹如垂綿日中不散
十月辛酉南京西華門內有烟無火三日始滅

禮臣往視乃舊宮材木瘞土中久烟自生土石皆焦
以水沃之始滅

愍帝崇禎六年五月癸巳霍山縣有木甌飛墮不知所
自來 七年二月丁巳太康門牡丹開者三

太康知縣集邑紳議其事梁墮而死

草異

宋孝宗淳熙中太平州產異麻若靈芝

臣等謹按王圻續通考又載理宗端平元年八月

紹慶府黃登進對奏武泰軍因潛藩升紹慶府登
到任後荷生雙頭十年永州陶大社圃池中產蓮
並頭黃登屢進諛詞似不足信姑附錄以備考

遼太祖二年八月幽州進合歡瓜

互見土貢門

臣等謹按金史無草異可見王圻續通考亦闕

元泰定帝致和五年禁中芭蕉連理

順帝至正四年萍鄉州治前鳳凰池蓮生一本二花駢

首並蒂六年夏西澗書院產瑞草

丙申丁酉間

揚州兵火

之餘城中屋址遍生白菜大者重十五斤小者亦不下八九斤有力人所負纔四五顆云

臣等謹按歷代甲子圖丙申丁酉乃元至正十六

十七兩年也

明太祖洪武五年六月嘉瓜生於句容民家

句容民張穀賓家圃瓜生雙實同蒂禮部尚書陶凱
以獻

穀異 野穀竹米附

宋高宗紹興十五年臨川禾登九穗

郡守晁謙之言足為瑞應乞宣付史館

寧宗慶元五年夏房陵民李祖振獲異麥二本一本五

穗一本二歧

臣

等謹按馬端臨通考載穀異訖於宋徽宗政和

二年今從王圻續通考補錄二條如右又圻載嘉定三年四年瑞麥生所產地及莖穗皆闕姑附錄

之

理宗景定元年十二月辛丑建陽縣嘉禾生一本十五穗

是時福建提學李伯玉奏繪圖來上以皇太子始封於建陽允為上瑞詔改建陽為嘉禾縣

四年九月昌化縣進嘉禾嘉粟

是時明裡慶成帝謂休瑞應期一德感通之驗詠詩賜丞相

臣等謹按王圻續通考又載二年四月建康言瑞

麥五莖各兩歧三年四月嚴州言麥生兩穗附錄
之

度宗咸淳四年七月温州禾異畝同穎 六年八月甲
申瑞安府樂清縣嘉禾生

遼穆宗應歷二年九月甲寅朔雲州進嘉禾四莖二穗
聖宗統和九年八月癸酉銅山嘉禾生 二十年夏南
京平州麥秀兩歧

道宗太康三年九月癸亥玉田進嘉禾

金太宗天會三年九月壬午廣寧府進嘉禾 四年十月丁未中京進嘉禾

熙宗皇統三年五月丁巳朔京兆府貢瑞麥七月庚辰太原路亦如之 四年正月乙丑陝西進嘉禾十有二

莖莖皆七穗 五年閏十月壬辰懷州進嘉禾

海陵貞元元年十一月丙戌朔定州獻嘉禾

世宗大定二年八月丁卯永興縣進嘉禾 四年七月

臨潢府境禾黍穰生 二十四年正月辛卯朔真定嘉

禾二本六莖異畝同穎 二十九年

時章宗已即位

十月辛丑

沁州丹州進嘉禾十二月河間府進嘉禾

章宗明昌元年正月懷州河間等處進嘉禾

宣宗興定元年四月陳州商水縣進瑞麥一莖四穗開
封進瑞麥一莖三穗二莖四穗七月大社壇產嘉禾一
莖十五穗十月丹州進嘉禾異畝同穎

元世祖至元元年十月壬子恩州歷亭縣進嘉禾一莖
九穗十一月丁酉太原臨州進嘉禾二莖四穗 四年

十月辛未太原進嘉禾二本異畝同穎 六年九月癸
丑恩州進嘉禾一莖三穗 七年五月壬戌東平府進
瑞麥一莖二穗三穗五穗者各一本 十一年七月乙
未興元鳳州進麥一莖七穗穀一莖三穗 十四年八
月襄陽生嘉禾 十七年十一月甲寅太原路堅州進
嘉禾六莖 十八年八月壬辰瓜州屯田進瑞麥一莖
五穗 二十年九月癸巳鄂端宣慰司劉恩進嘉禾同
穎九穗七穗六穗者各一 二十三年六月廣元路闍

中麥秀兩歧九月南部縣生嘉禾一莖九穗 二十四

年八月癸亥濟州進瑞麥一莖九穗 二十五年八月

丙辰秦州蒲鄉縣進嘉禾 二十六年十二月寧州民

張世安進嘉禾二本 二十九年二月壬申澤州獻嘉

禾 三十一年嘉禾生京畿一莖九穗

成宗大德元年十一月辛未曹州禹城縣進嘉禾一莖

九穗 九年嘉禾生應州山陰縣

武宗至大三年九月河間等路獻嘉禾

有異畝同穎及一莖數穗勅繪為圖

仁宗皇慶二年八月嘉禾生渾源州一莖四穗 延祐

四年九月己巳大都南城產嘉禾一莖十一穗 七年

五月時英宗
己即位丁未饒州鄱陽進嘉禾一莖六穗

英宗至治元年十月壬子左丞相拜珠獻嘉禾兩莖同

穗 二年八月壬申蔚州民獻嘉禾

泰定帝泰定元年十月成都穀一莖九穗

順帝至元四年五月彰德獻瑞麥一莖三穗 至正元

年九月冀寧路嘉禾生異畝同穎延平順昌縣嘉禾生
一莖五穗 三年八月晉寧臨汾縣嘉禾生有五穗至
八穗者 十年彰德路穀麥雙穗 十六年大同路秦
城鄉嘉禾生一莖二穗五穗有九穗者有異莖而同穗
者 十八年處州山谷中小竹結實如小麥饑民采食
之 二十一年明州象山縣竹穗生實如小麥可食
二十六年五月壬午洛陽縣康家莊有瑞麥一莖五穗
三穗雙穗者甚衆

臣等謹按王圻續通考載順帝元統時唐山民岳園瑞禾有一莖雙穗者有一本十三穗者而年次失考六年洛陽產瑞麥有一莖三四穗者史皆不載又於二十六年後載癸巳大平城北有瑞麥一莖兩歧考歷代甲子圖當是至正十三年不應列於二十六年後也

明太祖洪武二十八年九月壬辰朔北平永清衛之龍門生嘉禾異莖同穗

時成祖封北平命斂之遣使來進帝喜親製詩一章
以賜

成祖永樂四年六月丙寅南陽獻瑞麥

帝諭禮部曰比郡縣屢奏祥瑞獨此為豐年之兆命
薦之宗廟

世宗嘉靖八年八月西苑進嘉禾

初十日萬壽節戶部侍郎劉體乾獻二穗三穗者共
百本閣臣徐階等表賀

臣等謹按王圻續通考載嘉靖時嘉禾嘉穀甚多
蓋其時喜言符瑞故致此耳又載始興令楊應隆
祁州人言其遠祖掘地種竹忽地中鏗然有聲得
一石甕發之有物數百個長三寸餘見其上下膚
如穀形去膚熟之真是大米香美異常食之者壽
皆百二三十歲飲其汁者壽亦八九十嘗讀藏經
云太古之世穀長五六寸人壽皆數百歲又圖經
稱崑崙之墟有木禾食者得上壽豈其餘粒耶以

無年月可據附錄於此

芝草

臣等謹按馬端臨通考謂宋草木之瑞史不勝書而芝草尤多皆小人導諛為之迄於寧宗嘉泰二年今考宋史嘉泰後無可見者豈史氏有懲於馬氏之言而削之歟自後遼代無之而金元迄明獻瑞芝者不一嘉靖間尤甚蓋時方崇尚青詞物以類聚至於臣民競進數輒盈千然則芝之為瑞與

否亦槩可觀矣

宋理宗紹定元年漳州龍江書院仰高堂產芝九莖色如截肪

臣等謹按王圻續通考又載度宗咸淳四年玉芝生其地其狀皆闕不知何所據也

金世宗大定五年六月戊子河南府進芝草十三本

得於

芝田石上薦之太廟

甲辰大安殿楹生芝其色如玉 十年正月

鄧州進芝草 二十四年正月辛卯朔徐州進芝十有

八莖 二十六年正月庚辰河南府進芝三本

章宗明昌元年正月懷州河間等處進芝草

臣

等謹按王圻續通考載哀宗天興初荆王守純
府第產玉芝一株高五寸許色紅鮮可愛既而枝
葉津流成血臭不可聞剝而復生者再未幾有青
城之事

元世祖至元二年八月丙子濟南路鄒平縣進芝草一
本 八年九月癸酉益都府濟州進芝二本 十五年

四月濟南歷城進芝 十九年六月芝生眉州青城縣

景德寺 二十二年六月辛亥揚州進芝草 二十三

年四月丁未江東宣慰司進芝一本九月芝產於蒼溪

縣十月庚申濟寧路進芝二莖 二十六年三月癸巳

東流縣獻芝四月甲子池州貴池縣民王勉勉志作逸進紫

芝十二本六月丁丑汲縣民朱良進紫芝 二十八年

三月芝生鈞州翟陽縣 二十九年六月芝生賀州

臣等謹按王圻續通考載元世祖中統二年八月

濟州進芝二本殆即至元八年之訛也又云至元八年武安文廟大成殿產芝金色九莖叩之有金玉聲二十二年十月長葛郟城各進芝草附錄於此

成宗大德五年十二月興元西鄉縣進芝一本色如珊瑚六年正月濟南鄒平縣進芝一本五枝五葉色皆赤

武宗至大四年

時仁宗已即位

芝生國學大成殿

仁宗延祐二年三月芝生大成殿 五年七月大成殿
復生芝

順帝至元元年十二月己酉朔芝生荆門州當陽縣覆
船山一本五榦高尺有二寸一本二榦高五寸有半榦
皆兩歧二本相依附如珊瑚枝其高者結為華蓋慶雲
之狀 五年秋芝生中書工部之屋梁一本七榦

臣等謹按覆船山生芝草王圻續通考謂為世祖
至元時事則以至元年號相同而致誤不如五行

志為可據也又五年秋芝草生事圻亦誤為仁宗
延祐五年今皆從志

明世宗嘉靖三十七年十月癸丑禮部進瑞芝

凡一十八百六十本詔廣求徑尺以上者

臣等謹按嘉靖實錄四十三年八月御醫王金獻

萬壽香山一座聚芝三百六十本為之是歲天下

臣民進瑞芝甚衆已詳土貢考王圻續通考載嘉
靖三十六年十月諸山獻仙芝一千四百十本時

河南巡撫潘恩等各獻芝不一而足四十三年兩
廣都御史吳桂芳又進之四十五年有芝生於太
廟第三室

乃睿宗
初廟也

因命名玉芝宮云附錄備考

青青青祥

臣等謹按青青青祥馬端臨通考起於後漢永興
二年迄於唐乾元三年自後絕無可見惟王圻續
通考載金章宗泰和二年七月癸丑申刻日上有
氣內赤外青須臾乃散明神宗萬曆二十九年昭

應寺藏經閣上大小瓦獸六各口吐青氣一道冲
天半時方散已詳雲氣門故不贅載

明宣宗宣德元年八月辛巳東南天有青氣狀如人义
手揖拜

臣等謹按自宋迄明見於正史者惟此

欽定續文獻通考卷二百十八

欽定四庫全書

欽定續文獻通考卷二百十九

物異考

金異

臣等謹按馬端臨通考載金異始於周威烈王二十三年迄於宋寧宗慶元二年自後考之宋史無可見者遼金元明四朝亦不多有今但據正史書之他書間從附錄

遼太祖神冊元年二月將稱尊號改元掘地為壇得金鈴因名其地曰金鈴岡

聖宗統和十四年閏七月五院部進穴地所得金馬道宗大安七年六月倒塌嶺人進古鼎有文曰萬歲永為寶用

臣等謹按聖宗道宗兩朝事俱互見土貢門

元世祖至元十三年霧靈山伐木官劉氏言檀州大路錐山出鐵鑛有司覆視之尋立四冶

臣等謹按王圻續通考載至元中有趙生者宋宗室子家貧居閩之深山業薪以自給一日伐木溪澗見一巨蛇章質盡白昂首吐舌若將噬生生棄斧奔避歸以告妻因念白者豈寶物變幻耶即拉夫同往蛇尚未去見其夫婦來迴首溯流而上尾之行數百步則入一巖穴中就啟之得石石陰刻押字與歲月姓名乃黃巢手瘞治為九穴中穴置金甲餘八穴金銀無算後金甲歸一路官珍龍表甚

至任滿他適其妻徙至榻下一夕聞繞榻風雨聲
頃刻而止頗怪之夫婦共取視鐻鑰如故啟籠無
有矣又載歲壬午杭州張存於番中獲聖鐵一塊
厚廣僅及二寸作法撒沙布地噲鐵於口刀刃不
能傷其身有烏瑪喇奉使來取試以鐵納於羊口
籠其首作法撒沙驗之劍果無所傷去鐵復揮應
手首落遂就進呈考歷代甲子圖所謂壬午乃世
祖至元十九年也

成宗大德元年雲州聚陽山等冶言鑛石煽煉銅貨不出

順帝至正二十三年石州有人持鎗矛忽生火焰抹之

即無搖之即有

互見火異門

明太祖洪武十一年正月元旦甲戌早朝殿上金鐘始叩忽斷為二

臣等謹按王圻續通考載洪武八年庫錢庫銀飛

或曰此陰盛陽微之徵時南臺民家屋上有錢暨

立瓦上各貫以竹或得一二十文皆庫錢也又一
日廣積庫內鎮庫銀重數百斤忽穿庫飛出一
儒生夜坐見田間火起曰此必有寶因標識其地
比旦往視標在秧田中去土尺許得白銀有硃填
廣積字重不可舉遂告相識者十八人同掘取分
爭不平乃聞於官帝曰此銀已失三塊矣殆天所
以畀是儒也其賜之餘止與傭工錢

穆宗隆慶六年七月七日有物轟轟飛至直隸華亭海

濱墜於地乃鐘也鑄時年月具在識者謂其來自閩云
熹宗天啟六年五月丁未京城石獅擲出城外銀錢器
皿飄至昌平閱武場中

愍帝崇禎六年五月癸巳有鐵斧飛落霍山縣

臣等謹按明史五行志所載金異有互見於諸門

者如太祖洪武十一年六月丁卯夜寧夏衛風雨

兜鍪旗槩皆有火光惠帝建文二年四月乙卯燕

王營於蘇家橋兵端火光如毬上下相擊金鐵錚

錚弓弦自鳴此已見於火異門者也洪武十二年
十二月甲子徐州衛譙樓銅壺自鳴乙丑復鳴武
宗正德四年三月甲寅蓋州衛城樓鐘自鳴者三
七年文登秦始皇廟鐘鼓自鳴成山衛如之神宗
萬曆二十六年五月庚寅古浪城樓大鐘自鳴者
三愍帝崇禎八年十二月辛巳夜四鼓山東鎮南
城樓大礮鳴如鐘至黎明大吼一聲乃止十三年
三月丙申蘄州城隍廟古鐘自鳴此當見於物自

鳴者也憲宗成化十三年六月壬子雨錢於京師
世宗嘉靖六年五月甲午京師雨錢此別見於天
雨異物者也故不贅載

玉石之異

臣等謹按馬端臨通考玉石之異亦終於慶元二
年自後宋史無可見者惟王圻續通考載理宗端
平元年八月戊寅紹慶府黃登進對奏武泰建節
之邦在唐為武泰軍節度使今陛下潛藩升為紹

慶府龍飛一年之先大雨洗土石骨皆龍鱗或係
登傳會之語未可知也遼金二史亦無可考故竟
從元始

元世祖至元二年十一月己丑瀆山大玉海成勅置廣
寒殿

王圻曰丞相巴延嘗至于闐國鑿井得一玉佛高
三四尺色如截肪照之見筋骨脈絡即貢上方又
有白玉一段高六尺濶五尺長十七步以重不可

致

武宗至大元年正月幽王徹伯爾進玉六百二十五斤

互見土
貢考

順帝至正十年正月甲戌隕石於棣州色黑中微有金星先有聲自西北來至州二十里而隕三月慶元奉化州南山石笑開其碎而大者有山川人物禽獸草木之文 二十七年七月龍山大石起立

明太祖洪武十二年左丞相胡惟庸宅井上生石筍去

之復旁出者三

熹宗天啓四年河南臨漳得玉璽巡撫副都御史程紹以聞

臨漳民耕地漳濱得玉璽龍紐龜形方四寸厚三寸文曰受命于天既壽永昌以獻紹紹聞之於朝畧言秦璽不足徵久矣今璽出適在臣疆既不當復埋地下又不合私秘人間欲遣官恭進闕廷跡涉貢媚且至尊所寶在德不在璽故先馳奏聞候命進止昔王

孫圜不寶玉珩齊威王不寶照乘前史美之今尚有
一代名賢如鄒元標馮從吾孫慎行等皆憂國奉公
白首魁艾其他詞林臺諫一銅不起者皆盛朝珍寶
臣不能汲致明廷徒獻符貢瑞臣竊羞之伏願惟賢
是寶勿事虛拘亟圖登進彼區區秦壘之真偽又安
足計哉

臣等謹按明代玉石之異見於志者甚少考王圻
續通考太祖洪武九年二月泰安民於蒿里得玉

匣內有玉簡十六獻於朝驗其刻乃宋真宗祀太
山后土文仍瘞其地三十一年即建文二年正月
辛酉朔凝命神寶成先是惠帝在儲宮時嘗夢神
人致上帝命授以重寶及元年使者還自西方得
青玉於雪山踰二尺質理溫栗至是郊祀宿齋宮
夕夢若有覩乃驚寤遂命玉人琢之為大璽方一
尺六寸九分賜名凝命神寶其文曰天命明德表
正萬邦精一執中宇宙永昌孝宗弘治十三年六

月二十二日獲玉璽於趙倫村在陝西西安府鄠縣道安里有常命于天既壽永昌八字皆篆文人曰即傳國璽

臣等又按明史黃尊素傳熹宗天啟四年八月河南進玉璽廠閣魏忠賢欲侈其事命由大明門進行受璽禮百僚表賀尊素上言昔宋哲宗得璽蔡確等競言祥瑞改年元符宋祚卒不競本朝弘治時陝西獻玉璽止令取進給賞五金此祖宗故事

宜從事獲中止可為王圻續通考陝西進璽之證也

白青白祥

宋度宗咸淳九年江南平地產白毛臨安尤多

遼太祖天顯元年正月己未白氣貫日

金世宗大定五年六月丙午京師地生白毛 二十年

五月丙寅京師地生黑白毛 二十三年三月癸丑地

生白毛五月丁亥復生白毛 二十九年五月

時章帝已即位

丁未地生白毛

章宗明昌元年二月癸丑地生白毛

臣

等謹按王圻續通考載哀宗至大三年三月省
前有氣微黃自東北至西南其狀如虹中有白物
十餘往來飛翔已見雲氣門

元仁宗皇慶元年六月丁卯天雨毛

順帝元統二年六月彰德雨白毛 六年七月延安路

鄜州雨白毛如馬鬃所屬邑亦如之 至正十三年四

月冀寧榆次縣雨白毛如馬鬃七月泉州路雨白絲

十八年五月益都雨白氈 十九年三月遵化路連日

雨氈 二十五年五月甲子京師雨氈長尺許如馬鬃

二十七年五月朔白氣亘天山東天雨毛益都天雨

氈

臣等謹按王圻續通考載仁宗皇慶二年八月黃

梅縣天雨毛順帝至正十九年八月安仁怪物見

空中白色頭黑尾銳雷震忽失所在志皆不見又

載順帝至正十八年四月山東天雨白毛殆即志
五月益都事二十五年五月京師天雨毛殆即志
五月甲子日事也特重出耳

明太祖洪武十九年九月丙子天雨絮

宣宗宣德元年七月甲午地生毛長尺餘

英宗正統八年十一月浙江地生白毛


憲宗成化十三年四月甘肅地裂生白毛 十五年五

月常州地生白毛 十七年四月南京地生白毛

孝宗弘治元年五月丙寅瀘州長寧縣雨毛

武宗正德十二年四月金華地生黑白毛長尺餘

世宗嘉靖七年十二月望白氣亘天津



欽定續文獻通考卷二百十九

欽定四庫全書

史部

欽定續文獻通考卷二百十

給事中_臣劉芬覆勘

總校官內閣中書_臣孫溶

欽定四庫全書

欽定續文獻通考卷五百二十

物異考

歲凶

臣等謹按馬端臨通考所載歲凶始於魯莊公二十八年訖於宋寧宗嘉定十七年自高宗紹興後遇有賑濟事即以注綴於其下今以賑濟見於國用考故不贅載

宋理宗嘉熙四年紹興府荐饑臨安府大饑嚴州饑

臣等謹按理宗紀淳祐六年泉州歲饑十二年衢

信饑寶祐六年湖北諸郡饑皆見於賑濟門矣若

王圻續通考載理宗嘉熙四年温州饑開慶元年

又饑景定三年臨安及揚真泰饑史所不見附錄

於此

度宗咸淳七年江南大饑八年冬襄陽饑人相食

臣等謹按度宗紀咸淳二年六月衢州饑亦見於

賑濟門王圻續通考又載咸淳四年七月有襄陽
饑事

恭帝德祐二年正月揚州饑三月揚州穀價騰湧人相
食

臣等謹按瀛國公紀元年五月饒信州饑令民入
粟補官不知志何以不載也

遼聖宗統和八年十一月吐谷渾民饑 二十五年十
二月饒州饑 開泰元年十二月奉聖州饑 六年十

月南京路饑 七年四月川饒二州饑 太平九年八月燕大饑

興宗景福元年七月薊州民饑 十月黃龍府饑

道宗咸雍四年春西京及雍州朔州饑 七年十一月

饒州饑 八年歲饑 太康元年正月雲州饑 四月平

州饑 閏四月平灤二州饑 九月南京饑 二年二月黃

龍府及南京路饑 三年二月中京饑 四年正月東

京饑 大安三年春中京饑 四月義州饑 四年春上

京南京及平錦來三州饑 八年十月西北路饑 壽
隆五年十月遼州饑 六年十月平州饑

臣等謹按以上所載皆互見賑恤門

天祚帝乾統十年歲大饑 天慶八年十二月山前諸
路大饑

時乾顯宜錦興中等路斗粟直數錢民削榆皮食之
既而人相食

金太宗天會六年冬伊蘭路饑 十年伊蘭海蘭等路

饑

熙宗皇統二年二月熙河路饑

章宗明昌二年秋山東河北旱饑

衛紹王大安二年四月山東河北饑斗米至千餘錢

宣宗貞祐四年春河朔饑人相食

哀宗天興二年歲饑

十月縱饑民老稚羸疾者出城給以船聽採城壕麥

芟水草以食

臣等謹按金史帝紀太宗天會元年咸州以南蘇復州以北年穀不登世宗大定三年二月灤州饑十二年五月山東東路和倫明安民饑章宗明昌四年四月河州饑衛紹王崇慶元年五月河東陝西大饑斗米錢數千宣宗興定五年京東歲饑皆已見賑濟門若王圻續通考載崇慶二年京兆饑斗米至八千錢考衛紹王紀崇慶無二年次年即改元至寧亦不聞京兆饑也

元世祖中統元年五月澤州益州饑 二年六月塔齊爾部饑七月桓州饑 三年五月甘州饑閏九月濟南鄆俱饑

臣等謹按王圻續通考載元代歲饑最為繁冗以帝紀考之每因賑恤而追書其事已詳賑恤門矣

至元二年四月遼東饑 五年九月益都饑 六年十一月濟南及固安高唐二州饑 七年五月東京饑七月山東淄萊等州饑 八年正月西京益都饑 九年

四月京師饑七月碩達勒達部饑十七年三月高郵
郡饑十八年二月浙東饑四月通泰宗明等州饑
十九年九月真定路饑民流徙鄂州二十三年七月
宣寧路饑二十四年九月平灤路饑十二月蘇常湖
秀四州饑二十五年十一月烏梁海部饑二十六
年春哈瑪爾部及安西甘州等路饑四月遼陽路饑冬
武平及檀州饑蠡州及河間保定二路饑

臣等謹按世祖紀二十六年兩書河間保定饑一

則弛河泊之禁一則發義倉糧賑之仍免今歲田
租也今從志餘多類此

二十七年二月開元路寧遠縣饑四月浙東婺州及河
間任邱保定定興等縣九月河東山西道俱饑

臣等謹按世祖紀所載是歲各部民戶饑不可勝
數皆以賑恤事而書之者

二十八年三月真定河間保定平滌太原平陽等路及
杭州平江鎮江廣德太平徽州饑九月武平路十二月

洪寬女真部大都內郡饑 二十九年正月清州興州
二月輝州龍山里州和中二縣及東安固安薊棣四州
三月威寧昌州閏六月南陽懷孟衛輝等路俱饑 三
十年十月京師饑

臣等謹按成宗紀至元三十一年成宗已即位十
月遼陽行省所屬九縣饑十二月已雅爾台呼喇
珠所隸一千戶饑俱詳賑恤門

成宗元貞二年四月平陽絳州太原陽曲台州黃巖饑

大德元年六月廣德路七月寧海州文登牟平等縣
饑 三年八月揚州淮安等郡饑 四年二月湖北饑
三月寧國太平二路九月建康常州江陵等郡饑 六
年五月福州饑六月杭州嘉興湖州廣德寧國饒州太
平紹興慶元婺州等郡及大同路饑七月建康路十一
月保定路饑 七年二月真定路五月太原龍興南康
袁州瑞州撫州等路高唐南豐等州六月浙西七月常
德路俱饑 八年六月烏撒烏蒙益州芷江東川等路

饑 九年三月常寧州饑五月寶慶路八月揚州饑
十年三月濟州任城饑四月漢陽淮安道州柳州七月
黃州沅州永州九月成都十一月揚州辰州俱饑

臣等謹按元史陳孚傳大德七年兩浙大饑台州
諸路尤甚是其時不止於浙西饑也又武宗紀大
德十一年武宗已即位秋冬間書饑者不一而足
皆見賑恤門

武宗至大元年二月益都般陽濟寧濟南東平泰安大

饑六月山東河南江淮等郡大饑 二年七月徐州邳

州饑

臣等謹按元史胡長孺傳至大元年兩浙大饑

詳

恤門不知志何以不載也

仁宗皇慶元年六月鞏昌河州路饑 二年三月晉寧

大同大寧四川鞏昌甘肅等郡四月真定保定河間等

路五月順德冀寧二路六月上都俱饑 延祐元年六

月衡州七月台州十二月歸德汝寧沔陽安豐等郡俱

饑 二年正月晉寧宣德懷孟衛輝益都般陽等路十
二月漢陽路俱饑 三年二月河間濟南濱棣等處四
月遼陽蓋州及南豐州五月寶慶桂陽澧州潭州永州
道州袁州俱饑 四年正月汴梁饑 五年四月上都
饑 六年八月山東濟寧饑 七年 時英宗
已即位 五月大同
雲內豐勝諸郡邑及瀋陽路八月廣東新州新城縣俱
饑

臣等謹按仁宗延祐七年之八月五行志誤作八

年今從紀改正又以地理志考之廣東新州所領
縣一為新興恐新城亦新興之訛也若建昌路之
新城則屬江西行省矣

英宗至治元年正月蘄州蘄水縣饑七月南恩新州十
一月鞏昌成州十二月慶元真定二路俱饑 二年三
月河南淮東淮西諸郡延安延長宜川二縣奉元路四
月東昌霸州九月臨安河西縣俱饑 三年二月京師
三月平江嘉定州崇明黃巖二州十一月鎮江丹徒沅

州黔陽縣十二月歸澧二州俱饑

秦定帝秦定元年正月惠州新州南恩州信州上饒縣
廣德路廣德縣岳州臨湘華容等縣饑二月慶元紹興
二路綏德州來脂清澗二縣三月臨洮狄道縣石州離
石縣四月江陵軍監利縣五月贛州吉安臨江等郡崑
山南恩等州八月冀寧延安江州安陸杭州建昌常德
全州桂陽辰州南安等路屬州縣九月紹興南康二路
十一月泉州及中牟延津二縣俱饑 二年正月梅州

及祿施英德二州閏正月河間真定保定瑞州四郡二
月鳳翔路三月薊鄆徐邳等州濟南肇慶江州惠州四
月杭州鎮江寧國南安潯州潭州等路五月廣德袁州
撫州六月寧夏路九月瓊州成州及德慶路十二月濟
南延川等郡俱饑 三年二月河間保定真定三路三
月大都永平奉元十一月瀋陽大寧永平廣寧金復州
甘肅額齊訥路俱饑 四年正月遼陽諸郡二月奉元
長清萊蕪二縣建康淮安蘄州屬縣四月通薊等州漁

陽永清等縣七月武昌江夏縣俱饑 致和元年二月
乾州饑三月晉寧冀寧奉元延安等路四月保定東昌
般陽彰德大寧五路屬縣五月河南東平大同等郡七
月威寧長安縣涇州靈臺縣俱饑

文宗天曆二年正月大同及東勝州涿州房山范陽等
縣饑四月奉元耀州乾州華州及延安邠寧諸縣饑流
民數十萬大都興和順德大名彰德懷慶衛輝汴梁中
興等路泰安高唐曹冠徐邳等州江東浙西二道俱饑

八月忻州十月漢陽武昌常德澧州等路饑鳳翔府大饑三年正月寧海州文登牟平縣懷慶衡州二路真定汝寧揚廬蘄黃安澧等郡饑二月河南大饑三月東昌須城堂邑縣沂莒膠密寧海五州臨清定陶光山等縣鞏昌蘭州定西州四月德州清平縣俱饑至順二年二月集慶嘉興二郡及江陰州檀順維密昌平五州六月興和路高原咸平等縣九月思州鎮遠府俱饑十二月河南大饑三年四月大理中慶路五月常寧州

七月滕州八月大都寶坻縣俱饑

順帝元統元年夏兩淮大饑 二年春淮西七月池州

十一月濟南萊蕪縣俱饑 至元元年春益都路沂水

日照蒙陰莒四縣及龍興路夏京師俱饑是歲沅州道

州寶慶及邵武建寧饑 二年順州及淮西安豐浙西

松江浙東台州江西江撫袁瑞湖北沅州廬陽縣俱饑

三年大都及濟南蘄州杭州平江紹興溧陽瑞州臨

江俱饑 五年上都開平縣桓州興和寶昌州濮州之

郵城冀寧之文城益都之膠密莒濰四川遼東瀋陽路
湖南衡州江西袁州八番順元等處皆饑 六年順德
之邢臺濟南之歷城大名之元城德州之清平泰安之
奉符長清淮安之山陽等縣歸德邳州益都般陽處州
婺州四郡皆饑 至正元年春京畿州縣真定河間濟
南及湖南饑夏彰德及溫州饑 二年保德州大饑
三年衛輝冀寧忻州大饑人相食 四年霸州大饑人
相食東平路東阿陽穀汶上平陰四縣皆大饑冬保定

河南饑 五年春東平臨須城東阿陽穀三縣及徐州
大饑人相食夏濟南汴梁河南邠州瑞州温州邵武饑
六年五月陝西饑 七年彰德懷慶東平東昌晉寧
等處饑 九年春膠州大饑人相食鈞州新鄭密縣饑
十四年春浙東台州江東饒閩海福州邵武汀州江
西龍興建昌吉安臨江廣西靜江等郡皆大饑人相食
十七年河南大饑 十八年春莒州蒙陰縣大饑斗
米金一斤冬京師大饑人相食彰德山東亦如之 十

九年正月至五月京師大饑銀一錠得米僅八斗死者
無算濟南及益都之高苑莒之蒙陰河南之孟津新安
通沁等縣皆大饑人相食二十一年霸州饑民多殍
死

臣等謹按以上俱從志全載若王圻續通考又有
記志皆不載者悉闕之

明太祖洪武二年湖廣陝西饑四年陝西游饑五
年濟南東昌萊州大饑樹皮草實食為之盡六年蘇

州揚州真定延安饑 七年北平所屬州縣三十三饑
十五年河南饑 十九年春河南洊饑夏青州饑
二十年山東三府饑 二十三年湖廣三府二州饑
二十四年山東及太原饑徐沛民食草實 二十五年
山東洊饑

成祖永樂元年北畿山東河南及鳳陽淮安徐州上海
饑 二年蘇松嘉湖四府饑 四年南畿浙江陝西湖
廣府州縣衛十四饑 五年順天保定河間饑 十年

山東饑 十二年直省州縣二十四饑 十三年順天
青州開封三府饑 十四年平陽大同二府饑 十八
年青菜二府饑

仁宗洪熙元年北畿饑山東河南湖廣及南畿州縣三
十四饑

宣宗宣德元年直省州縣二十九饑 二年直省縣十
四饑 三年直省州縣十五饑 六年直省縣十饑
八年以水旱告饑者府州縣七十有六 九年南畿山

東浙江陝西山西江西四川多告饑湖廣尤甚 十年
揚徐滁南昌大饑

臣等謹按王圻續通考宣宗宣德朝止載八年山
東旱饑其畧而不詳如此

英宗正統三年春平涼鳳翔西安鞏昌漢中慶陽兗州
七府及南畿三州二縣江西浙江六縣饑 四年直省
州縣衛十八及山西隰州大同宣府偏頭關諸處饑
五年直省十府一州二縣饑陝西大饑 六年直省州

縣二十六饑 八年夏湖南饑秋應天鎮江常州三府饑 九年春蘇州府饑是歲雲南陝西乏食 十年陝西山西饑 十二年夏淮安岳州襄陽荊州郴州俱洊饑 十三年寧紹二府屬饑

景帝景泰元年大名順德廣平保定處州太原大同七府饑 二年大名廣平又饑順天保定西安臨洮大同解州饑 三年淮徐大饑死者相枕藉 四年徐州洊饑河南山東及鳳陽饑 五年兩畿十府饑 六年春

兩畿山東山西浙江江西湖廣雲南貴州饑蘇松尤甚
七年北畿山東江西雲南又饑河南亦饑

英宗天順元年北畿山東並饑

發塋墓研道樹殆
盡父子或相食

二

年長沙辰州永州常德岳州五府及銅鼓五開諸衛饑
四年湖廣及鎮遠府都勻平越諸衛饑 六年陝西

饑

憲宗成化元年兩畿浙江河南饑 二年南畿饑 四
年兩畿湖廣山東河南無麥鳳陽及陝西寧夏甘涼饑

五年陝西游饑 六年順天河間真定保定四府饑

食草木
殆盡

山西兩廣雲南並饑 八年山東饑 九年山

東又大饑

餘無
餘尚

十三年南畿山東饑 十四年北畿

湖廣河南山東陝西山西饑 十五年江南饑 十六

年北畿山東雲南饑 十八年南畿遼東饑 十九年

鳳陽淮安揚州三府饑 二十年陝西饑道瑾相望畿

南及山西平陽饑 二十一年北畿山東河南饑 二

十三年陝西大饑

武功民有殺
食宿客者

淮北山東亦饑

臣等謹按王圻續通考載二十年七月河北燕南
諸省大饑志不載

孝宗弘治元年應天及浙江饑 六年山東饑 七年

保定真定河間三府饑 八年蘇松嘉湖四府饑 十

四年順天永平河間河南四府饑 遼東大饑 十五年

遼東存饑 兗州饑 十六年浙江山東及南畿四府三

州饑 十七年淮揚廬鳳存饑 人相食 或發瘞皆以繼之 十

八年延安諸府饑

世宗嘉靖二年應天及滁州大饑 三年湖廣河南大

名臨清饑南畿諸郡大饑

父子相食道裡相望輿彌千里

四年河間

瀋陽大同三衛饑 五年順天保定河間三府大饑

六年遼東大饑 八年真定廬鳳淮揚五府徐滁和

州及山東河南湖廣山西陝西四川饑襄陽尤甚 九

年畿內河南湖廣山東山西大饑 十二年北畿山東

饑 十五年湖廣大饑 十七年北畿饑河南鄆陽襄

陽三府饑 二十年保定遼東饑 二十一年順天永

平饑 二十四年順天永平洊饑南畿亦饑 二十五

年順天饑江西亦饑 二十七年鞏昌漢中大饑 三

十一年宣大二鎮大饑人相食 三十二年南畿廬鳳

淮揚山東河南陝西並饑 三十三年順天及榆林饑

三十六年遼東大饑人相食 三十九年順天永平

饑 四十年兩畿山西饑 四十三年北畿山東大饑

四十四年順天饑 四十五年淮徐饑

臣等謹按王圻續通考載世宗嘉靖十四年蘇松

淮揚江西湖廣歲凶戶部尚書梁材請改折漕糧
以寬民力十八年鄭鈞饑十九年河南鄖襄饑聞
承天興陵工饑民就食者餓死載道御史姚虞繪
圖以聞志皆不載

穆宗隆慶元年蘇松二府大饑 二年湖廣饑

神宗萬曆元年淮鳳二府饑民多為盜 十年延安慶

陽平涼臨洮鞏昌大饑 十三年湖廣饑 十五年七

月黃河以北民食草木富平蒲城同官諸縣饑

有以石
為糧者

十六年河南饑民相食蘇松湖三府饑 二十二年

河南大饑

給事中楊明繪中州饑民圖以進巡按陳登雲進饑民所食馬糞帝覽之動容

二十八年山東及河間饑 二十九年兩畿饑阜平縣

饑 有食其
稚子者

時蘇州饑民毆殺稅使七人

三十七年山西饑 四十年南畿沔饑鳳陽尤甚 四

十三年浙江饑 四十四年山東饑甚人相食河南及

淮徐亦饑 四十五年北畿民食草木山東屬邑多饑

四十六年陝西饑 四十八年湖南大饑

愍帝崇禎元年陝西饑延鞏民相聚為盜 二年山西

陝西饑 五年淮揚諸府饑流殍載道 六年陝西山

西大饑淮揚存饑

有夫妻雖經於樹及投河者並城教官王明佐至自縊於官署

七

年京師饑太原大饑人相食

御史龔廷獻繪饑民圖以進

九年南陽大饑

有母烹其女者

江西亦饑

十年浙江大饑人

相食

十二年兩畿山東山西陝西江西饑河南大饑

人相食盧氏嵩伊陽三縣尤甚

十三年北畿山東河

南陝西山西浙江三吳皆饑

自淮而北至南畿樹皮食盡發瘡齒以食

十

四年南畿饑

金壇民於延慶寺近山見人云此地深入尺餘其土

可食如言取之淘磨為粉而食取者日衆又長山十

里亦出土堪食其色青白類茯苓又石子澗土黃赤

狀如猪肝俗呼觀音粉食之多腹痛墮墜以死是歲
畿南山東游饑德州斗米千錢父子相食行人斷絕
大盜滋矣

地震

宋寧宗嘉定十四年五月丙申西川地震

臣等謹按馬端臨通考載地震訖於嘉定十四年
之正月未載五月丙申事今據宋史五行志補錄

理宗寶慶元年八月己酉地震 嘉熙四年十二月丙

天地震 淳祐元年十二月庚辰夜地震 寶祐三年

五月辛酉嘉定與叙南同日地震

度宗咸淳七年嘉定府城震者三

臣等謹按度宗紀是年七月壬午四川制置使朱

禕孫奏夏五以來嘉定地震者再與志小異

十年十月時恭帝已即位已巳閩中地震 德祐元年三月乙

亥閩中地大震

遼太宗天顯十二年四月甲申地震

穆宗應歷二年十一月己巳地震

聖宗統和九年九月己酉南京地震 太平二年三月

地震雲應二州屋摧地陷隗白山裂數百步泉涌成流

道宗清寧三年七月甲申南京地震 咸雍四年七月

南京地震 太康二年十一月南京地震民舍多壞

金熙宗天會十五年七月丙戌夜京師地震 天眷三

年十二月丁丑地震 皇統四年十月甲辰地震十一

月甲辰河朔諸郡地震

海陵正隆五年二月辛未河東陝西地震

時鎮戎德順等軍大風壞廬舍民多壓死海陵問司
天馬賁中等曰何為地震賁中等曰伏陽逼陰所致
又問震而大風何也對曰土失其性則地以震風為
號令人君嚴急則有烈風及物之灾

世宗大定四年三月庚子夜京師地震 五年六月丙

午京師地震有聲自西北來殷殷如雷七月戊申又震
十月丁丑又震 七年九月庚辰地震 二十年五月

丙寅京師地震 二十七年四月辛丑京師地微震

章宗明昌六年二月丁丑京師地震 承安五年五月

庚辰地震

衛紹王大安元年十一月丙申平陽地震有聲自西北

來戊戌夜又震

自復震動浮山縣尤劇城廨民居地者十七八死者凡二三千人

二

年二月乙酉地大震有聲殷殷然六月七月至九月晦

其震不一

宣宗興定三年四月癸未陝右黑風晝起有聲如雷頃

之地大震

平涼鎮戎德順尤甚廬舍傾壓死者以萬計雜書倍之

哀宗正大四年六月丙辰地震

元世祖至元二十一年九月戊子京師地震

臣等謹按世祖紀戊子作甲申與志小異

二十六年正月丙戌地震

先是帝在潛邸聞金進士李冶賢召問古今事又問
昨地震何如對曰天裂為陽不足地震為陰有餘夫
地道陰也陰太盛則變常今之地震或奸邪在側或

女謁盛行或讒慝交至或刑罰失中或征伐驟舉五者必有一於此矣夫天之愛君如愛其子故示此以警之耳苟能辨奸邪去女謁屏讒佞省刑罰慎征討上當天心下協人意則可以轉咎為休帝嘉納之

臣等謹按王圻續通考載至元元年十一月興國路地震四年八月漢陽地震十一年八月松滋枝江地震紀與志皆不載

二十七年二月癸未泉州地震丙戌泉州地復震八月

癸巳武平路地大震

屢死按察司官及總管府官王連等及民七千二百二十人壞倉庫

局四百八十間民居不可勝數

九月戊申武平又震

是歲地震北京尤甚地陷黑沙水涌出人死傷數十萬帝深憂之時駐蹕龍虎臺遣鄂爾根薩里召集賢翰林兩院官詢致災之由議者畏桑哥莫敢語及時政先是僧格理算天下錢糧民不聊生集賢直學士趙孟頫勸令鄂爾根薩里入奏帝赦天下盡與蠲除庶幾天變可弭帝從之草詔已具僧格怒謂必非帝

意孟頫曰凡錢糧未徵者其人死亡已盡非及時除免之他日言事者倘以失陷錢糧數百萬歸咎尚書省豈不為丞相深累耶僧格悟民始獲蘇

二十八年八月乙丑朔

乙丑志作己丑以世祖紀考之上為七月壬戌下為是月丙寅

故改平陽路地震

時壞廬舍萬有八百二十六區壓死者百五十人

成宗元貞元年三月壬戌地震 大德六年十二月辛

酉雲南地震戊辰亦如之 七年八月辛卯夕地震太

原平陽尤甚

壞官民廬舍十萬計平陽趙城縣范宣義郡堡徙十餘里

太原徐溝祁

縣及汾州平遙介休西河孝義等縣地震成渠泉涌黑沙汾州北城陷長一里東城陷七十餘步

詔問致災之由及弭災之道保章正齊履謙按春秋言地為陰而主靜妻道臣道子道也三者失其道則地為之不寧弭之之道大臣當返躬責己去專制之威以答天變不可徒為禳禱也時帝寢疾宰臣有專威福者故履謙言及之

八年正月平陽地震不止

時宮觀摧圮者千四百區道士死傷者千餘人軍民不可勝計皇后召平章政事阿錫頁問曰災異如此殆下民所致耶對曰天地示警民何與焉

九年四月己酉大同路地震有聲如雷

壞廬舍五千八百廬死者一千

四百餘人懷仁縣地裂二所涌水盡黑

其一廣十八步深十五丈其一廣六十六

步深一丈五月癸亥以地震改平陽路為晉寧太原路為冀寧

十一月壬子大同地震

十二月丙子地震 十月正月晉寧冀寧地震不止

十一年八月

時武宗
已即位

壬寅開城路地震

王宮及官民廬
舍皆壞壓死故

素王妃伊囉軒
等五千餘人

戊午冀寧路地震

武宗至大元年六月丁酉鞏昌隴西寧遠縣地震雲南
烏撒烏蒙地三日而大震者六九月己酉蒲縣地震十
月癸巳蒲縣靈縣地震

臣等謹按九月己酉紀作丙寅十月靈縣紀作陵
縣存以備考

二年十二月壬戌陽曲縣地震有聲

三年十二月戊

由漢寧路地震

四年

時仁宗
已即位

三月己亥寧夏路地震

七月癸未甘州地震大風有聲如雷閏七月甲子寧夏

地震

仁宗皇慶二年六月己未朔京師地震丙寅亦如之七月壬寅又震

臣等謹按五行志作六月丙寅京師地震己未丙

辰壬寅俱震與此異己未日前作丙寅後作丙辰

又於壬寅不書七月皆志之訛也故從紀

延祐元年二月戊辰大寧路地震四月甲申朔又震有
聲如雷八月丁未冀寧汴梁等路陟縣武安縣地震十
一月癸酉大寧地震如雷 三年九月己未冀寧晉寧
等郡俱地震十月壬午河南地震 四年正月壬戌冀
寧地震七月辛卯又震九月壬辰嶺北地震三日 五
年正月甲戌懿州地震二月癸巳朔和寧路地震五月
己卯德慶路地震

英宗至治二年九月癸亥地震十一月癸卯地震

臣等謹按英宗紀是年十一月乙卯宣德府宣德縣地屢震已見賑濟門

泰定帝泰定元年四月庚辰以風烈月食地震手詔戒飭百官十二月庚申奉元路同州地震有聲如雷

是年六月車駕在上都先是以災異詔百官集議中書平章政事張珪與樞密院御史臺翰林集賢兩院官議言前宰相特們德爾專政十年群邪並進如逆賊特克實之徒名為義子實其腹心終以遺患構成

弒逆其子索諾木親與逆謀今復回給所籍家產其
諸子尚在京師黃緣再入宿衛宜仍籍家產竄其子
孫以懲大姦諸王諳達布哈博囉伊嚕音特穆爾庫
魯克布哈等弒逆之黨天地不容宜誅之以謝天下
遼王托克托居鎮遼東國家有變報復讐忿殺親王
妃主百餘人分其羊馬畜產殘忍骨肉今不之罪乃
復厚賜放還臣恐國之紀綱由此不振況今死者含
冤感傷和氣宜奪削其爵土置之他所以彰天威武

備卿濟蘭前太尉布哈詐稱奉旨令鷹師強收鄭國寶妻噶哈刑曹逮鞠服寶竟原其罪縱惡如此何以為政成宗以來賈胡中賣寶石之弊分珠寸石售直數萬以經國有用之寶而易此不濟饑寒之物皆時貴與鄂拓克中寶之人妄稱呈獻冒給回賜高其直且十倍蠶蠹國財暗行分用請禁止之自古聖君惟誠於治政可以動天地感鬼神初未嘗徼福於僧道也至元三十年醮祠佛事之目止百有二大德七年

再立功德使司積五百有餘今年一增其目明年即指為例已倍四之三矣比年佛事愈繁享國不永致灾愈速事無應驗斷可知矣宜罷功德使司及累朝忌日醮祠佛事名目止令宣政院主領修舉餘悉停罷游惰之徒妄投宿衛部屬及宦者女紅太醫陰陽之屬不可勝數耗國損民宜如世祖時支請之數給之餘悉簡汰庫特齊牧養馬駝歲有常法宜如大德團槽之制所賜諸王公主駙馬及百官宦者之田悉

二百二十
拘還官其僧道典買民田及民間所施產業宜悉役
之左右之臣非有功勲勞效著明實跡不加賞賜請
皆著為令凡數千言詞甚切至帝終不能從

三年十二月丁亥寧夏路地震如雷發自西北連震者

三
三紀
作四

四年三月癸卯和寧路地震如雷八月鞏昌

通渭縣山崩碣門地震有聲如雷鳳翔興元成都陝州

江陵等郡地同日震九月壬寅寧夏地震十一月辛卯

冀寧路陽曲縣地震 致和元年七月辛酉朔寧夏地

震已卯大寧路地震十月

時文宗已即位

壬寅大寧路又震

臣等謹按王圻續通考載文宗天歷元年二月合肥縣地震十月大寧路地震考帝紀天歷改元即在泰定帝之致和元年九月十三日其年二月並無合肥地震事若十月之大寧地震則當係於致和不必重見也

文宗至順二年四月庚戌真定陟縣地一日五震或三震月餘乃止

臣等謹按五行志庚戌作丁亥考文宗紀前為戊申後甲寅則志之訛也故從紀若紀稱真定武陟縣地震逾月不止以地理志考之真定路有陟縣武陟則屬懷慶路乃紀之訛也故從志

三年四月戊申大寧路地震五月戊寅京師地震有聲八月己酉隴西地震九月丁丑夜京師地震有聲

臣等謹按三年志作四年訛也續通鑑綱目既書三年秋八月京師隴西地震九月地震又書四年

夏五月京師地震蓋兼採紀志而王圻續通考復
兼採紀志與綱目重疊書之不知三年十月庚子
寧宗即位十一月壬辰崩四年六月己巳順帝遂
即位改為元統元年爾時並無地震事也

順帝元統元年十一月癸卯安慶潛山縣地震十二月
饒州德興縣餘干樂平二州地震 二年五月信州地
震八月辛未京師地震 至元元年十一月壬寅興國
路地震十二月丙午安慶路地震所屬宿松太湖潛山

三縣同時俱震廬州蘄州黃州亦如之是月饒州地亦震 二年正月乙丑宿松地震 三年八月壬午京師地大震凡六日癸未河南地震

京師震時太廟梁柱裂各室牆壁皆壞壓損儀物文宗神主及御床盡碎西湖寺神御殿壁仆壓損祭器自是累震至丁亥方止所損人民甚衆戊子修理文宗神主并廟中諸物

臣等謹按五行志載三年八月辛亥夜京師地震

壬午又大震考順帝紀是年七月有庚戌太白晝
見壬子車駕幸乾元寺事計自辛亥至壬午越三
十餘日是志之訛也

四年二月乙酉奉聖州地震八月辛未宣德府地大震
丙子京師地震日二三次至乙酉乃止

先是正月丙申以地震赦天下至八月癸未又以地
震改宣德府為順寧府奉聖州為保安州

臣等謹按五行志載三年八月順州龍慶州及懷

來縣皆以辛巳夜地震壞官民房舍傷人及畜牧
宣德府亦如之遂改為順寧是未核宣德之地震
改名乃在四年也又載四年春保安州及瑞州路
新昌州地震七月巳酉保安州地大震八月密州
安邱縣地震此又奉聖所以改名之故而紀之互
異處亦多矣

至正元年二月巳未汴梁路地震 二年四月辛丑冀
寧路平晉縣地震聲如雷裂地尺餘民居皆傾十二月

巳酉

志作
乙酉

京師地震

三年二月鈞州新鄭密縣地震

十二月膠州及屬邑高密地震

四年八月莒州蒙陰

縣地震十二月東平路東阿陽穀平陰三縣及漢陽地

震五年正月薊州地震所領四縣及東平汶上縣亦

如之十二月乙丑鎮江地震六年二月益都路益都

昌樂壽光三縣濰州北海膠州即墨縣地震三月高苑

縣地震壞民居九月戊子

志作
戊午

邵武地震翌日地中有

聲如鼓夜復如之七年二月益都臨淄臨朐濰州之

昌邑膠州之高密濟南之棣州地震三月東平路東阿陽穀平陰三縣地震河水動搖五月臨淄地又震七日乃止十一月鎮江丹陽縣地震 九年六月台州地震

十年冀寧徐溝縣地震 十一年四月冀寧路汾忻

三州文水平晉榆次壽陽四縣晉寧之榆社懷慶河內

修武二縣及孟州皆地震聲如雷

地房屋壓死者甚衆

八月丁丑

中興路公安松滋枝江三縣峽荆門二州地震 十二

年二月丙戌霍州靈邱縣地震三月

志作閏三月丁丑

陝西地

震

時莊浪定西靜寧會州尤甚移山湮谷陷沒廬舍有
不見其跡者會州公廳墻圯得弩五百餘張長丈餘
短者九尺人莫能開挽改定西為安定州會州為會

寧州

十三年三月莊浪定西靜寧會州地震 十四年四月
癸巳朔汾州介休縣地震泉涌七月孝義縣地震十一
月寧國路地震所領寧國旌德二縣亦如之淮安路海

州地震十二月巳酉紹興地震 十五年六月丁丑冀

寧保德州地震 十六年正月薊州地震凡十日所領

四縣亦如之六月雷州地大震 十八年二月乙亥冀

寧臨州地震五月益都地震 十九年五月甲午慶元

地震 二十年二月延平順昌縣地震 二十二年三

月南雄路地震 二十三年十二月丁巳台州地震

二十五年十月壬申興化路地震有聲如雷 二十六

年三月海州地震如雷六月壬子朔汾州介休縣地震

七月辛巳朔

志作辛亥

冀寧路徐溝縣石忻臨三州汾之孝

義平遙二縣同日地震是月河南府鞏縣地震 二十

七年五月山東地震十月丙辰福州地震十二月庚午

又震有聲如雷 二十八年六月庚子朔冀寧文水徐

溝三縣汾州孝義介休三縣臨州保德州隰之石樓縣

及陝西皆地震十月辛巳陝西地又震

明太祖洪武四年正月己丑鞏昌臨洮慶陽地震 五

年四月戊戌梧州府蒼梧賀州恭城立山等處地震六

月癸卯太原府陽曲縣地震七月辛亥又震壬戌京師地震八月癸未太原府徐溝縣西北空中有聲地震凡

三日戊戌陽曲又震九月壬戌又震者再十月戊寅辛

卯復震

是年陽曲地凡七震

八年七月戊辰京師地震十二月

戊子又震 十一年四月乙巳寧夏地震壞城垣 十

三年十二月甲戌福州府廣州府河州地震 十九年

六月辛丑雲南地震十一月己卯復震有聲 二十三

年正月庚辰山東地震

臣等謹按五行志又稱自六年至十四年陽曲地
復八震不記月日應從附錄

惠帝建文元年三月甲午京師地震

成祖永樂元年十一月甲午北京地震山西寧夏亦震

二年十一月癸丑京師濟南開封並震有聲 六年

五月壬戌京師地震 十一年八月甲子京師地震

十三年九月壬戌北京地震 十四年九月癸卯北京

地震 十八年六月丙午北京地震 二十二年六月

壬申南京地震

仁宗洪熙元年二月戊午六安衛地震凡七日

是歲南京地震

凡四十
有三

宣宗宣德元年七月癸巳京師地震有聲自東南迄西

北是歲南京
地震者九

二年春南京地震屢震

三年南京地震屢

震 四年兩京地震 五年正月壬子南京地震辛酉

又震

英宗正統三年三月己亥京師地震庚子又震甲辰又

震者再 四年六月乙未復震八月己亥又震 五年

十月庚午朔蘭州莊浪地震十日十月十一月屢震

壞城

堡虛金壘

元人言 十年二月丁巳京師地震

景帝景泰二年七月癸丑京師地震 三年南京地震

五年十月庚子京師地震有聲起西迄東南

英宗天順元年十月乙巳南京地震

憲宗成化元年四月甲申鈞州地震二十三日乃止

三年四川地屢震五月壬申宣府大同地震有聲咸遠

湖州亦震

壞墩臺橋垣墜傷人

四年八月癸巳京師地震有聲

十二月戊戌湖廣地震 五年十二月丙辰汝寧武昌

漢陽岳州同日地震 六年正月丁亥河南地震是年

湖廣亦震 十年四月壬午鶴慶地震九月己巳自寅

至申復十五震

壞廟舍民居傷人畜

十月丁酉靈州大沙井驛地

震有聲如雷

自後其夜屢震

十一月甲寅一日十一震

城堞房屋多圮

十二年正月辛亥南京地震十月辛巳京師地震

十三年正月己巳鳳陽臨淮地震有聲閏二月癸卯臨

洮鞏昌地震四月戊戌甘肅地裂又震有聲榆林涼州

亦震寧夏大震聲如雷

城垣崩壞者
八十三處

甘州鞏昌榆林涼

州及沂州剡城滕費嶧等縣同日俱震九月甲戌京師

地三震十四年六月廣西太平府地震至八月乙巳

凡七震七月四川鹽井衛地連震

廟宇頽廢
人畜多死

十六年

八月丁巳四川越嵩衛一日七震越數日連震十七

年二月甲寅南京鳳陽廬州淮安揚州和州兗州及河

南州縣同日地震五月戊戌直隸薊州遵化縣地震六

月甲辰又震日三次永平府及遼東寧遠衛亦三震

十七年二月初十日禮部奏南京江北同日地震考
之傳記地動千里有大災又云春動者歲凶二月動
者水災今所動不止千里况南京鳳陽皆祖宗根本
之地宜行各處守臣理冤抑恤孤寡以消變異廣儲
蓄省費用以備凶荒濬河渠築河堤以防水患從之

二十年正月庚寅京師及永平宣府遼東皆震宣府地

裂

天齊山密雲古北口居庸關
城垣墩堡多摧人有壓死者

五月甲寅代州地七震

二十一年二月壬申泰安地震三月壬午朔復震聲

如雷後四日復微震癸巳乙未庚子連震四月癸未擊

昌府固原衛及蘭河洮岷四州地俱震有聲癸巳薊州

遵化縣地震有聲越數日復連震

城垣民居
有頹仆者

五月壬戌

京師地再震九月丙辰廉州梧州地震有聲連震者十

六日十一月丙寅京師地震二十二年九月辛亥成

都地日七八震俱有聲次日復震

孝宗弘治元年八月壬寅漢茂二州地震

仆黃頭等寨
硯房三十七

戶人口有
壓死者
十二月辛卯四川地震連三日
二年五月

庚申成都地震連三日有聲
三年十二月己未京師

地再震
四年六月辛亥地三震八月乙卯南京地震

淮揚二府同日震
六年三月寧夏地震連三年共二

十震四月甲辰開封衛輝東昌兗州同日地震有聲

七年二月丁丑曲靖地震
壞房屋壓死軍民
是歲兩京並六震

八年三月己亥寧夏地震十二次聲如雷
傾倒邊牆墩臺房屋

壓傷人
九月甲午至辛丑安南衛地十二震十月壬戌至

甲子海州九震是歲南京地再震

八年十二月有詔修省求直言南京戶部主事胡耀
上疏言地震之數災之小者也西北旱疫父子相食
東南饑疫骨肉流離大變也特深居九重左右蒙蔽
未之知耳今季廣揚鵬引用劉良輔輩左道惑亂聖
心齋醮費財差遣在外如虎橫行吞噬無厭士大夫
昏夜乞哀於宮宦貴戚交相賄託不以為恥言官有
所舉劾瞻前顧後苟且塞責如小吏徐珏忠義敢言

乃悞聽奸臣之愬置之於法御史王槐依阿罪之陛下所以奉行天地之事羣臣所以奉行陛下之事者如此陰盛陽微災異曷由以弭乞用臣言則奸佞斥陰慝消矣疏入人為耀危之未幾廣輩果以贓敗

九年兩京地震者各二次 十年正月戊午京師山西地震六月乙亥海豐地震聲如雷數日乃止是歲真定

寧夏榆林鎮番靈州太原皆震毛留尤甚

如舟將覆屋瓦皆落

十三年七月己巳京師地震十月戊申南京鳳陽同時

地震 十四年正月庚戌朔延安慶陽二府同華諸州
崑陽長安諸縣潼關諸衛連日地震有聲如雷朝邑尤

甚頻震十七日

城垣民舍多摧
壓死人畜甚衆

縣東地圻水溢成河自

夏至冬復七震是日陝州永寧盧氏二縣平陽府安邑

滎河二縣俱震有聲蒲州自是日至戊午連震丁丑福

興泉漳四府地俱震二月蒲州地又震至三月癸亥凡

二十九震八月癸酉貴州地三震十月辛酉南京地震

時兵部尚書馬文升上言考之歷代固有地震未有

震於正月朔日者亦未有震開而裂水將成河者此
乃非常之異古今所未見者也伏望祇畏變異修省
刻責行仁政以安養斯民重臺諫以廣開言路府庫
之金幣重為撙節以備緊急之用無益之齋醮暫免
修設以省浪費之繁念錢糧之空虛止傳奉無例之
官憫蠶民之艱窘禁奏討有礙之地遵聖祖之訓每
清晨視朝法列聖之規日奏事二次疏入帝筵之云
視朝奏事朕自加省織造絨褐內官便取回餘俱議

行之

十五年九月丙戌南京徐州大名順德濟南東昌兖州

同日地震濮州尤甚

壞城垣民舍
壓死百餘人

是日開封彰德平陽

澤潞亦震十月甲子山西應朔代三州山陰馬邑陽曲

等縣地俱震聲如雷丁卯南京地震十六年二月庚

申南京地震十八年六月癸亥寧夏地震聲如雷九

月癸巳杭嘉紹寧四府地震有聲甲午南京及蘇松常

鎮淮揚寧七府通和二州同日地震辛丑蒲解二州絳

夏平陸滎河聞喜為城猗氏七縣地俱震有聲安邑萬

全尤甚

民有壓死者

武宗正德元年二月癸酉至乙亥邵陽地震者十餘次有聲如雷四月癸丑雲南府連日再震木密關地震如

雷凡五

珠城垣屋舍壓傷人

八月丁巳萊州府鼇山衛地震聲如

雷以後屢震萊州自九月至十二月地震四十五俱有

聲如雷 二年九月庚午雲南府南安州新興州三日

連震

接城民舍人有死者

四年五月己亥夜武昌見碧光如電

者六有聲如雷已而地震

臣等謹按王圻續通考正德元年正月丙寅天鳴地震六月震郊壇及太廟奉天殿五年七月四川威茂潼川等處皆地震有聲如雷史不載

六年四月乙未楚雄地三日五震至明年五月又連震十三日十月甲辰大理府鄧川州劍川州洱海衛地震鶴慶劍川尤甚

壞城垣房解人有壓死者

十一月戊午京師地震保

定河間二府及八縣三衛山東武定州同日皆震霸州

連三日十九震 七年五月壬子楚雄府自是日至甲

子地連震聲如雷八月己巳騰衝衛地震二日

壞城樓
官民解

宇赤水涌出田禾
盡沒死傷甚衆

八年十二月戊戌成都重慶二府

潼川邛二州地俱震 九年六月甲辰鳳陽府地震有

聲八月乙巳京師大震十月壬辰叙州府太原府代平

榆次等十州縣大同府應州山陰馬邑二縣俱地震有

聲 十年五月壬辰雲南趙州永寧衛地震踰月不止

有一日二三十震者

黑氣如霧壞城垣官解民居不
可勝計死者數千人傷倍之

八月丁丑大理府地震至九月乙未復大震四日十一
年八月戊戌南京地震武昌亦震十二月己未楚雄大
理二府蒙化景東二衛俱震十二年四月甲子撫州
府及餘干豐城二縣泉州府俱地震浙江金鄉衛自是
日至七月己丑凡十有五震六月戊辰雲南新興州及
通海河西嶧我諸縣地震壞城樓房屋
民有壓死者九月己卯濟青
登萊四府地震是歲泉州二月至六月金華二月至七
月皆數震十三年六月己巳大理府及趙鄧川二州

浪穹縣地震是日蒙化亦震十月甲午十一月癸卯又
震十四年二月丁丑京師地震九月丙午昌平州宣
府開平等衛亦震丙辰福興泉三府地震十五年三

月丙申安寧姚安賓川蒙化鶴慶俱地震蒙化震二日

仆城垣廡舍
民有壓死者

八月辛酉景東衛地震聲如雷

搖仆城牆
解宇地多

拆乙丑濟南東昌開封地震

世宗嘉靖二年正月南京鳳陽山東河南陝西地震七

月壬申浙江定海諸衛地震

城堞
盡毀

三年正月丙寅朔

兩畿河南山東陝西同時地震辛巳蘇常鎮三府地震
是年南京震者再 四年八月癸卯徐州鳳陽一衛三
州縣及懷慶開封二府俱地震聲如雷九月壬申鳳陽
徐州及開封二縣復震 五年四月癸亥永昌騰衝騰
越同日地震貴州安南衛地震聲如雷壬申復震 六
年十月戊辰京師地震 十二年八月丁酉京師地震
十五年十月庚寅京師又震順天永平保定萬全都
司各衛所俱震聲如雷 十六年九月癸酉雲南地震

十八年七月庚寅楚雄臨安廣西又震 十九年四月庚午洮州甘肅俱震 二十一年九月甲戌平陽固原寧夏洮州同日地震有聲十一月丁巳鞏昌固原西安鳳陽地震 二十二年三月乙巳太原震有聲凡十日明年三月復如之四月庚辰福興泉漳四府地震 二十三年三月朔太原地震有聲者十日

臣等謹按王圻續通考載嘉靖二年十二月地震自下弦起至明年元旦連日大震十一年正月十

八日青州府地震聲吼如雷十九日雲南尋甸軍
民府陸涼衛地震倒塌城牆房屋四月十五日雲
南府地震六月二十五日陝西隆德縣地震如雷
九月十七日福州府地震二十一日寧夏衛地震
十二年正月癸巳隆慶右衛地震如雷威川州亦
如之二十四年遼東海寧衛地震有聲如雷志不
載

二十七年七月戊寅京師地震順天保定二府俱震八

月癸丑京師復震登州府及廣寧衛亦震 三十年九月乙未京師地震有聲 三十一年二月癸亥鳳陽府地震有聲三月丙戌山西亦如之 三十四年十二月壬寅山西陝西河南同時地震聲如雷

時渭南華州朝邑三原蒲州等處尤甚或地裂泉湧中有魚物或城郭房屋陷入地中或平地突成山阜或一日數震或累日震不止河渭大泛華嶽終南山鳴河清數日官吏軍民歷死八十三萬有奇

三十七年正月庚申陝西地震三月丁丑昌平州地震
五月丁卯蒲州地震連震三日聲如雷六月甲申又震十
月丙午華州地震聲如雷至壬子又震戊午復大震傾
陷廬舍甚多 三十八年七月辛巳南京地震有聲

三十九年四月嘉興湖州地震

屋廬搖動如帆河
水激撞魚皆躍起

四

十年二月戊戌甘肅山丹衛地震有聲

壞城堡
廬舍

六月壬

午太原大同榆林地震寧夏固原尤甚

城垣墩臺府屋
皆摧地湧黑黃

沙水壓死軍民無算
城廣武紅寺等城

四十一年正月丙申京師地震

是歲寧夏地震 四十五年正月癸巳福建福興泉三府同日地震

臣等謹按王圻續通考三十六年十二月兗州地震三十七年七月河南南陽府地震三十九年行谿縣地震四月寧夏地震六月香山新會縣地震有聲志不載

穆宗隆慶二年三月甲寅陝西慶陽西安漢中寧夏山西蒲州安邑湖廣鄖陽及河南十五州縣同日地震戊

寅京師地震是日山東登州四川順義等縣同日震

崇禎

地裂三大餘者
二寧遠城崩

四月癸未懷慶南陽汝寧寧夏同日地

震乙酉鳳翔平涼西安慶陽地震

壞城傷人

三年十一月

庚辰京師地震

四年四月戊戌京師地震

五年六

月辛卯朔京師地震者三

臣等謹按王圻續通考所載二年地震事自正月

至四月不可勝書與志互有異同今從志不贅載

神宗萬曆元年八月戊申荆川地震至丙寅方息 二

年二月癸亥長汀地震

裂成坑陷
沒民居

三年正月甲戌湖

廣江西地震五月戊戌朔襄陽鄖陽及南陽府屬地震

三日己亥信陽亦震六月戊子福汀漳等府及廣東之

海陽縣俱地震九月戊午京師地震十月丁卯又震己

卯岷州衛地震己丑至壬午連百餘震四年二月庚

辰薊遼地震辛巳又震五年二月辛巳騰越二十餘

震次日復震

壞廟廡倉舍千餘間民居地
者十之七壓死軍民甚衆

七年七月

戊午京師地震八年五月壬午遵化數震七日乃止

七月甲午井坪路地大震

推城垣
數百丈

九年四月己酉蔚

州地震聲如雷大同鎮堡各州縣同時地震有聲 十

一年二月戊子承天府地震 十二年二月丁卯京師

地震五月甲午又震 十三年二月丁未淮安揚州廬

州及上元江寧江浦六合俱地震三月戊寅山西山陰

縣地震旬有五日乃止八月己酉京師地震 十四年

四月癸酉京師地震 十五年三月壬辰開封府屬地

震者三彰德衛輝懷慶同日震五月山西地震 十六

年六月庚申京師地再震 十七年七月己未杭州温

州紹興地震 十八年六月丙子甘肅臨洮地震

壞城郭廡

合壓死人言無算 八月福建地屢震 十九年三月己巳昌平

州地震十月戊戌山丹衛地震 二十三年五月丁酉

京師地震十二月癸亥陝西地震聲若雷 二十四年

十一月福建地震 二十五年正月壬辰朔四川地震

三日八月己卯遼陽廣寧諸衛地震甲申京師地震宣

府薊鎮等處俱震十二月乙酉京師地震 二十六年

正月朔寧夏地震八月丁丑京師地震有聲 二十七

年七月辛未承天沔陽岳州地震 二十八年二月戊

寅京地震

自良方西南
行如是者再

臣等謹按王圻續通考載神宗萬曆二十二年九

月山東十一月蘇州府地震二十三年正月松江

府地震二十七年四月永平府九月灤州等處地

震志不載

三十一年四月丙午承天府鍾祥縣地震

房屋多有
摧裂者

五

月戊寅京師地震 三十二年閏九月庚辰鞏昌及醴

泉地一日十餘震

城郭民居並摧白
陽吳泉界地裂

三十三年五月

辛丑陸川地震有聲

壞城垣房屋壓
死男婦無算

九月丙申京師地

震者再自東北向西南行 三十四年六月丙辰陝西

地震 三十五年七月乙卯松潘茂州汶州地震數日

三十六年二月戊辰京師地震七月丁酉又震 三

十七年六月辛酉甘肅地震

紅崖清水諸堡壓死軍民
八百四十餘人地邊壞八

百七十里
裂東關地

四十年二月乙亥雲南大理武定曲靖地

大震次日又震緬甸亦震五月戊戌雲南大理曲靖復

大震 四十二年九月庚午山西河南地震 四十三

年二月己卯揚州地震

狼山寺殿
壞塔頽

八月乙亥楚雄地震

如雷十月辛酉京師地震 四十五年五月甲戌鳳陽

府地震乙亥復震 四十六年六月壬午京師地震九

月乙卯再震畿輔山西州縣一十有七及紫荊關馬水

沿河二口偏頭神池同日地震 四十八年二月庚戌

雲南及肇慶惠州荊州襄陽承天沔陽京山皆地震

熹宗天啓二年二月癸酉濟南東昌河南海寧地震三

月癸卯濟南東昌屬縣八連震三日九月甲寅平涼隆

德諸縣鎮戎平虜諸所馬剛雙峰諸堡地震如翻

壞城垣七

千九百餘文屋宇萬一千八百餘區墜死男婦萬二千餘口

十一月癸卯陝西地震

三年四月庚申朔京師地震十月乙亥復震閏十月

乙卯雲南地震十二月丁未南畿六府二州俱地震揚

州尤甚是月戊戌京師地又震 四年二月丁酉薊州

永平山海地屢震

壞城郭廬舍

甲寅京師地震

宮殿動搖有聲銅缸之水

騰波
震盪

三月丙辰戊午又震庚申又震者三六月丁亥保

定地震

壞城郭
傷人畜

八月己酉陝西地震十二月癸卯南京

地震 六年六月丙子京師地震濟南東昌及河南一

州六縣同日震天津三衛宣府大同俱數十震山西靈

邱晝夜數震月餘方止

城郭廬舍並摧
壓死人民無算

七月辛未河南

地震九月甲戌福建地震十二月戊辰寧夏石空寺堡

地大震

礧山石殿傾
倒壓死僧人

是年南京地亦震 七年寧夏各

衛營屯堡自正月己巳至二月己亥凡百餘震

大如雷
小如鼓

如風城垣房屋
邊牆墩臺悉圮

十月癸丑南京地震自西北迄東南隆

隆有聲

愍帝崇禎元年九月丁卯京師地震 三年九月戊戌

南京地震 四年六月乙丑臨洮鞏昌地震

壞廬舍
損民畜

五年四月丁酉南京四川地震十月丁卯山西地震十

一月甲寅雲南地震 六年七月戊戌陝西地震 八

年冬山西地震 九年三月戊辰福建地震 十年正

月丙午南京地震七月壬午雲南地震十月乙卯四川

地震十二月陝西西安及海利同時地震數月不止

十一年九月壬戌遼東地震十二年二月癸巳京師

地震十三年十一月戊子南京地震十四年三月

戊寅福建地震四月丙寅湖廣地震五月戊子甘肅地

震六月丙午福建地震七月甲午四川地震十五年

五月丙戌兩廣地震七月甲申山西地震十六年九

月鳳陽地屢震十一月丙申山東地震十七年正月

庚寅朔鳳陽地震乙卯南京地震三月辛卯廣東地震

山崩 地陷 地移 地長 川竭

宋理宗寶慶二年七月戊辰遂安休寧兩縣界山裂

度宗咸淳十年八月癸丑

時帝昇
巳即位

天目山崩

餘杭民溺死者無算

遼天祚帝保大二年十二月居庸關崖石自崩

時秦晉王淳妻伊德妃以勁兵守居庸及金兵臨關
崖石自崩戍卒多壓死不戰自潰

臣等謹按金史凡山崩川竭等俱無所見元史帝

紀世祖至元二十七年八月癸巳武平地陷已見地震門若王圻續通考至元六年九月奉化州山崩水涌及桃源山崩事紀不載考五行志乃順帝至元六年五月六月之訛也

元成宗大德元年七月丙戌郴州路耒陽州衡州之鄴

縣大水山崩

溺死三百餘人

七年八月辛卯平陽太原地裂

成渠 九年四月乙酉大同懷仁縣地裂二所涌水盡

黑、梁出松柏朽木

十年三月乙未道州營道等處暴雨江溢

山裂

漂蕩民居
溺死者衆

武宗至大三年六月襄陽峽州路荆門州大水山崩

壞官

解民居二萬一千八百二十九
間死者三千四百六十六人

仁宗延祐二年五月乙丑秦州成紀縣山移是夜疾風

電電北山南移至夕河川次日再移

平地特出土阜高
者二三大陷沒民

居

四年七月己丑成紀縣山崩

土石潰徙壞田稼
廬舍壓死居民

五年二月丁酉秦州秦安縣山崩五月己卯鞏昌隴西

縣南土山崩

壓死
居民

六年八月伏羗縣山崩

臣等謹按五行志五年七月戊子鞏昌路寧遠縣山崩八月秦州成紀縣暴雨山崩朽壤起覆沒畜產與伏羗縣山崩連書之考武宗紀皆不載且五年八月有戊子車駕至自上都事不應七月內有戊子若伏羗山崩則又訛六年為五年也

英宗至治元年八月壬戌秦州成紀縣山崩 二年十

二月甲子朔南康建昌州大水山崩

死者四十七人

泰定帝泰定元年七月戊申定州屯河溢山崩八月癸

未秦州成紀縣大雨山崩水溢

壅土至來谷
河成卹旱

二年四

月戊申鞏昌路伏羌縣大雨山崩六月丁未秦州秦安

山移九月丁丑漢中道文州霖雨山崩 四年八月鞏

昌府通渭縣山崩又天全道山崩

飛石
斃人

文宗至順元年七月己未通渭山崩 四年八月

時順
帝已

即位壬申鞏昌徽州山崩九月庚申秦州山崩十月丙寅

鳳州山崩十一月丙申鞏昌成紀縣地裂山崩辛亥秦

州地裂山崩

順帝元統二年八月辛未京師鷄鳴山崩陷為池

池方百里

人死者甚衆

至元二年正月乙丑宿松縣地裂五月壬申秦州山崩

四年六月信州路靈山裂七月丙辰鞏昌府山崩

壓死

人六年六月己亥秦州成紀縣山崩地坼

臣等謹按五行志載六年五月甲子慶元奉化州

山崩水涌出平地溺死人甚衆六月庚戌桃源鄉

山崩壓溺民居五十三家死者三百六十餘人即

王圻續通考以世祖年號相同而誤載於前者然紀
於後至元中亦不載恐前志或別有誤故從附錄

至正二年四月辛丑平晉縣地裂六月壬子濟南山崩

七月庚午惠州路羅浮山崩

凡二十七處壞
民居塞田澗

三年二

月秦州成紀縣鞏昌府寧遠伏羌縣山崩 六年六月

廣州增城縣羅浮山崩七年五月河東地圻泉涌

崩城
陷屋

傷人 八年五月庚子廣西山崩灘江溢 九年七月

庚寅永春縣南象山崩

壓死者
甚衆

十年三月奉化州山

石裂有禽鳥草木山川人物之形五月甲子龍興寧州
大雨山崩數十處丙寅瑞州上高縣蒙山崩 十二年

閏三月丁丑莊浪定西靜寧會州移山陷谷十月丙午

霍州趙城縣霍山崩涌石數里

前三日山鳴如
雷禽獸驚散

十三

年七月汾州白彪山圻 十五年四月寧國敬亭麻姑

華陽諸山崩 十七年十月靜江路東門地陷城東石

山崩十二月丁酉慶元路象山縣鵝鼻山崩 二十六

年三月贛榆縣吳山崩六月壬子紹興路山陰縣卧龍

山裂七月丙辰泉州同安縣三秀山崩是月河南府鞏

縣山崩十二月庚午蒲城洛水和順崖崩

其崖戴石有窟穴可居是

日壁死避亂者七十餘人

二十七年六月丁亥沂水山崩

聲如七雷

月丙戌靜江靈川縣大藏山石崖崩

臣等謹按王圻續通考載二十六年六月沂水山

崩殆即二十七年之訛又載二十八年龍興靜安

縣山石迸裂人多死者六月忻州蒙昌山有巨石

大如屋崩裂墜地聲震如雷七月廣西靈川縣臨

江石崖崩考紀與志皆不載或六月之山石崩裂以沂水而訛作忻州七月之靈川崖崩以一事而復作兩歲耳

明太祖洪武六年正月壬戌朔伏羗高山崩

臣等謹按馬端臨通考山崩之後附以川竭然明史中絕無可見者

英宗正統八年十一月浙江紹興山移於平田是歲陝西二處山崩十三年通渭平涼華亭三縣山傾軍民

壓死者八十餘口

景帝景泰三年七月永新珠坑村地陷十七所 六年

二月甲午安福大雷雨白泉陂羊塘地陷二

一深三丈
廣十餘丈

一深六尺廣

一丈有奇

英宗天順四年十月星子山裂

憲宗成化八年七月隴州北山吼三日裂成溝長半里

尋復合 十三年四月戊戌甘肅地裂 十六年四月

壬子巨津州金沙江北岸白石雪山斷裂里許

兩岸山
合山上

草木如故下塞江流黍稷盡
沒久之其下漸開水始泄

六月長樂平地出小阜人

畜踐之輒陷明年復湧一高山十七年十二月辛丑

壽陽縣城南山崩聲如牛吼二十年正月庚寅宣府

地裂湧沙出水九月辛巳費縣地陷

深三尺縱橫三文許

二十

二年六月壬辰漢中府及寧羗衛地裂

或十餘丈或六七丈寶雞

縣地裂

長三里濶丈餘

二十一年三月壬午泰山動搖

孝宗弘治元年八月戊申宣府葛峪堡地陷

深三尺長五十步濶

一大沙河中湧

高一丈長七十步

三年六月乙巳河州山崩

地陷 九年六月庚寅山陰蕭山二縣同日大雨山崩

十一年六月丙子桂林地有聲若雷旋陷九處

大者圍十

七丈小者七丈或三丈

十四年正月朝邑縣東地坼八月癸丑

四川可渡河巡檢司地裂而陷

湧泉數十湫衝壞橋梁莊舍壓死人畜甚衆

閏七月烏撒軍民府大雨山崩 十五年八月戊申宣

府合河口石山崩九月丙戌濮州地裂湧水

壓死百餘人

十八年六月丙子河州沙子溝夜大雷雨石岸山崩移

七八里

崩處裂為溝田廬民畜俱陷

武宗正德元年十二月癸亥即墨三表山石崩 四年

三月甲寅遼東東山大家峪山崩二處約丈餘廣寧大

興堡地陷

長四尺寬三尺深四丈餘

五年六月癸巳秦州山崩

傷屋

廬禾稼甚衆

龍王溝口山亦崩

六年七月丙寅夔州獐子

溪驟雨山崩

十年五月雲南趙州永寧衛地裂 十

三年五月癸亥黑鹽井山崩井塞 十五年八月辛酉

景東衛地多圻裂丁丑趙州大雨山崩

世宗嘉靖四年七月乙酉清源賈家山崩 五年四月

壬申貴州牙蘇屯山崩 十九年十二月己巳峩眉宋

皇觀山鳴震裂湧泉水八日 二十一年六月乙酉歸

州沙子嶺大雷雨崖石崩裂塞江流二里許 二十六

年七月癸酉澄城麻陂山界頭嶺晝夜吼數日山忽中

斷移走

東西三里
南北五里

三十二年閏九月庚辰白陽吳泉

界地裂三文 三十四年十二月壬寅渭南華州朝邑

三原蒲州等處地裂

或城郭房屋陷入地
中或平地突成山阜

四十年六

月壬午太原大同榆林等處地湧黑黃沙水

臣等謹按王圻續通考載嘉靖四十二年北京觀象臺忽崩陷時尚書雷禮覓臺四圍並無餘土不知土從何去三日後訪知臺土移填於城外一潭潭且夷矣

穆宗隆慶二年三月戊寅樂亭地裂三大餘者二黑沙水湧出五月庚戌永樂州山崩七月辛酉陵川地裂三十餘步 四年八月湖州山崩成湖 五年二月丙午廣西靖江王府及宗室所居布政司官署俱地陷

神宗萬曆二年二月癸亥長汀地裂成坑 五年二月

辛巳騰越山崩 六年二月辛卯臨桂村田中青烟直

上隨裂地丈餘

鼓聲轟轟民居及大樹石皆陷

二十五年六月泰山

崩 二十六年正月戊子長樂地陷五丈 二十七年

八月甲午狄道城東山崩

其下街成一溝山南耕地湧出大小山五高二十餘丈

三十二年閏九月庚寅白陽吳泉界地裂三丈 三

十三年六月庚午靈川社壇陷有聲八月丙午鎮江

西南華山裂 三十七年六月辛酉甘肅南山崩 四

十五年八月濟南地裂者二

熹宗天啓元年四月癸丑延綏孤山城陷

長三十五丈
入地二丈七

尺

三年閏十月乙卯仁壽長山裂聲振如雷

長七里
寬三尺

深不
可測

四年二月甲寅樂亭地裂

湧黑水
高尺餘

愍帝崇禎六年正月丁巳鎮江地裂數丈

九年七月

丁未清江城陷十二月鎮江金雞嶺土山崩 十七年

秦州有二山相距甚遠民居其間者數百萬家一日地

震兩山合居民並入其中

臣等謹按以上所書多互見地震門不復分注

地生異物

宋度宗咸淳九年江南地生白毛臨安尤多

臣等謹按宋史載地生白毛僅見如右若遼史則無之至金之大定五年六月二十年五月二十三
年三月五月二十九年五月明昌元年二月明之
正統八年十一月成化十三年四月十五年五月
十七年四月正德十二年四月皆有地生白毛事

以已見白青白祥門茲不贅載

金哀宗正大七年十二月新衛州城北三里許有影在沙上如舊衛州城狀寺塔宛然數日乃滅

臣等謹按地生異物考元明正史俱無可見惟王圻續通考載明憲宗成化十三年二月甲午浙江山陰縣地忽涌泉如血高尺餘嘉靖四十四年浙江慈谿民家地涌血江西廬山田中涌血數畝高並如之三十七年浙江東陽民家地裂五六處各

涌血如線高尺許凝為片人就食之掘地無所見
三十九年湖廣竹谿地震出血神宗萬曆二十六
年九月蕭山民家竈前地下湧出鮮血約高尺許
此皆可補史所未載者故附錄焉

黃耆黃祥

宋恭帝德祐元年三月辛巳終日黃沙蔽天或曰喪氛
臣等謹按遼史無所為黃耆黃祥王圻續通考亦
闕焉

金章宗承安五年十月庚子雲色黃而風霾

宣宗貞祐三年十月丙申昏西北有霧氣如積土至二
更乃散

臣等謹按王圻續通考載貞祐元年九月元妃淑
妃王氏受封大風昏霾黃氣充塞天地蓋據后妃
傳王氏姊妹初受封日如此也

哀宗正大元年正月戊午大風飄端門瓦昏霾不見日
黃氣塞天 二年正月甲申有黃黑之祲

臣等謹按金史哀宗紀元年正月戊申朔詔改元

庚子帝居廬百官始奏事戊午始視朝尊皇后温

都氏元妃温都氏

即后妃傳所謂元妃淑妃王氏姊妹也

皆為皇太

后號其宮一曰仁聖一曰慈聖百官入賀於隆德

殿是日大風飄端門瓦與志相合志更云昏霾不

見日黃氣塞天而又云人以為壬辰癸巳之兆蓋

受封及受尊號時前後並如此誠可異矣

元順帝至元二十六年四月乙丑奉元路黃霧四塞

明英宗正統十一年二月辛酉有異氣現華蓋殿金頂
及奉天殿鴟吻之上

憲宗成化九年四月乙亥京師雨土 十三年四月戊
戌陝西甘肅冰厚五尺間以雜沙有青紅黃黑四色

孝宗弘治十年三月己酉雨土 十一年四月辛巳雨
土 十七年二月甲辰鄖陽均州雨沙

世宗嘉靖元年正月丁卯雨黃沙 十三年二月己未
雨微土 二十一年象山雨黃霧行人口耳皆塞

穆宗隆慶元年三月甲寅南鄭雨土

神宗萬曆二十五年二月癸亥湖州雨黃沙 四十六
年三月庚午暮刻雨土濛濛如霧如霰入夜不止 四
十七年二月甲戌從未至酉塵沙漲天其色赤黃 四
十八年山東省城及泰安肥城皆雨土

愍帝崇禎十二年二月壬申濬縣有黑黃雲起旋分為
二頃之四塞狂風大作黃埃漲天間以青白氣五步之
外不辨人踪至昏始定 十四年正月壬寅黃埃漲天

臣等謹按以上所書正史皆互見於恒風恒陰及
天雨異物門



欽定續文獻通考卷二百二十